

19/08/1997

Pemuda Umno ajak ulama muzakarah

KUALA LUMPUR, Isnin - Pergerakan Pemuda Umno mengundang tujuh ulama muktabar dalam muzakarah khas Khamis ini bagi membincangkan beberapa isu pelaksanaan undang-undang syariah di negara ini.

Muzakarah itu bertujuan mencari jalan menyelesaikan salah anggap dan salah tafsir segolongan ulama dengan pemerintah berhubung pentadbiran serta pelaksanaan undang-undang syariah, akhir-akhir ini.

Ketua Pemuda Umno, Datuk Ahmad Zahid Hamidi, berkata walaupun keadaan belum sampai ke tahap pertentangan, pergerakan itu berasa bertanggungjawab untuk bersama pucuk pimpinan menangani permasalahan itu.

Menurutnya, Pemuda Umno tidak akan membiarkan pucuk pimpinan keseorangan menangani permasalahan itu, sebaliknya bersama memberi penjelasan bukan saja melalui media, malah turun ke peringkat akar umbi.

"Tujuan muzakarah ini untuk mencari penyelesaian terhadap salah faham yang berlaku antara ulama dan umarak (pemerintah).

"Sejak akhir-akhir ini, ada ulama membangkitkan soal pentadbiran dan pelaksanaan undang-undang Islam di negara ini.

"Oleh itu, muzakarah bertemakan Kebijakanaksanaan Dalam Pelaksanaan Syariah ini antara lain membincangkan soal dasar dan pelaksanaan hukum syariah melalui kebijakanaksanaan," katanya kepada pemberita selepas mempengerusikan mesyuarat bulanan Exco pergerakan itu, hari ini.

Ekoran isu Jabatan Agama Islam Selangor menangkap tiga gadis Islam yang menyertai pertandingan ratu cantik, Mufti Selangor, Datuk Ishak Baharom, berkata ramai pemimpin kerajaan tidak berfikir dulu sebelum membuat kenyataan yang boleh menyebabkan syahadah mereka tergelincir.

Menurut Ishak, murtad hukumnya kepada sesiapa yang mempertikaikan syariat Islam, misalnya hukum hudud seperti yang hendak dilaksanakan oleh sebuah negeri.

Minggu lalu, Datuk Seri Dr Mahathir Mohamad berkata beliau tersinggung dengan kenyataan itu dan menyifatkan tuduhan itu keterlaluan kerana beliau tidak menyatakan pertandingan ratu cantik dihalalkan oleh Islam, sebaliknya tindakan terhadap tiga gadis itu perlu mencerminkan konsep keadilan dalam Islam.

Ahmad Zahid berkata, peserta muzakarah adalah kalangan Exco pergerakan, Ketua Pemuda Umno negeri, Ketua Penerangan Pemuda Negeri serta Pengerusi Majlis Agama Islam Pemuda negeri.

"Selepas muzakarah itu, Pemuda Umno akan mengeluarkan satu resolusi mengandungi tindakan susulan kami," katanya.

(END)